



Clypevs Theologiæ Thomisticæ

Continens Tractatus de attributis, de visione Beatifica, de scientia Dei, ac
de ejus voluntate, & Providentia

Gonet, Jean-Baptiste

Parisiis, 1669

Art. II. An attributa divina, tam ab essentia Dei, quam inter se, formaliter
ex natura rei distinguantur?

[urn:nbn:de:hbz:466:1-77232](#)

teriale intellectus creari, & proximus virtutis charitatis. Tertio potest dari aliquid objectum, quod non sit ita primarium, sicut per se specificatum, nec ita secundarium, sicut mere materiae, sed medio modo se habens inter haec: ita ut non quidem per se primo inspicatur, sicut specificatum, sed ratione alterius, quod tamen non sit distinctum & extrinsecum, sed intrinsecum in eo imbibitum & inclusum. Sic sonus ut acutus, non percipitur per se primo ab auditu, sed quodammodo secundario, ut est aliquid identificatum cum sono, qui est ratio per se inspecta ab auditu. Et hoc medio modo se habent relationes & attributa respectu intellectus divinae: sunt enim intelligibilia per essentiam, ut in ipsis intimè & transcendentaliter imbibit: quare licet illa non pertineat ad objectum formale & primarium divinae intellectus, sunt tamen quidam veluti modi intrinseci objecti formalis & primarij, qui necessarij debent attingi ab ipsa, ut est comprehensiva & intuitiva.

DISPUTATIO III. DE ATTRIBVTIS DIVINIS in communi.

CONSIDERATA natura & quidditate Dei, consequens est ut ejus proprietates & affectiones, que, *Attributa divina*, à Theologis appellantur, contempnemur; & prius de illis in communi, postea in particulari disseramus.

ARTICVLVS I.

Quid & quotplex sit attributum divinum?

Dico primò: *Attributum recte definitur, ratio seu forma quedam absoluta, in specie atoma constituta, formaliter & necessario in Deo existens, que ex modo nostro concipiendi, ad essentiam divinam, per modum veluti passionis, & proprietatis ejus, consequitur. Ita communiter docent Theologi, ex Damasceno libro 1. de Fide, cap. 12.*

Explicatur haec definitio. Primò dicitur, quod attributum debet esse forma quedam absoluta, ut per hoc distinguatur à relationibus divinis, quae rationem attributi non habent, cùm non sint tribus personis communes, sicut debet esse attributum, quod est quedam essentia divina proprietas. Secundò dicitur, quod debet esse in specie atoma constitutum, ut per hoc distinguatur à relationibus inadæquatis attributorum, quae proprie attributum non sunt. Additur quod debet in Deo formaliter existere, ut per hoc differat, tum à perfectionibus secundum quid creaturarum, que non sunt formaliter, sed tantum eminenter in Deo; tum à quibusdam denominatio-nibus intrinsecis, quibus Deus extrinsecè denominatur creator, gubernator, prouisor, &c. Dicitur etiam, illud esse necessario in Deo existens, ut per hoc ab actibus liberis distinguatur. Tandem additur, quod debet ad essentiam divinam, per modum proprietatis consequi, quia divina attributa ad constitutivum naturæ & quidditatis divinae non pertinent, ut constat ex precedenti disputatione, sed eam veluti modificant, & ad aliam lineam trahunt, & tanquam proprietates

A ad eam virtualiter consequuntur. Dico secundo: *Divina attributa esse virtualiter & eminenter plura.*

Probatur primò: Nam Sapientia 7. Spiritus Divinae Sapientiae dicitur *Vnus & multiplex*: unicus propter summam ejus simplicitatem, multiplex vero ob virtualem distinctionem, & pluralitatem eorum que in eo sunt, ut exponit D. Augustinus Epist. 102. Legitur (inquit) *Spiritus Sapientie multiplex, sed recte dicitur etiam simplex: multiplex enim, quoniam multa sunt que habet, simplex autem quoniam non aliud quam quod habet, est.* Hac est etiam ratio cur Hebrei attributa divina vocant *nomen Sephiroth*, teste Rabbi Moyse in commentarijs suis ad cap. 1. libri Jetira: *Abraham (inquit) Pater noster vocavit attributa Sephirot, quasi Saphiro, ad significandum, quemadmodum saphirus omnes colores recipit: sic Deo omnes formas, benedictiones, emanationesque tribui: ita tamen ut hac omnia summa Dei beneficij unitatem praedicent.*

Probatur secundo: Quamvis attributa divina non sint actu plures res, nec plures rationes formales; sed una omnino simplex (ut ostendemus articulo sequenti) haec tamē præstat totum quod præstant plures, si esset actu distinctæ; ad eum modum quo virtus Solis, quamvis non sit formaliter calor, præstat omnia qua præstaret calor ipse, seclusis imperfectionibus: Ergo sicut virtus Solis eminenter calor, vel calorem habere dicuntur; ita divina attributa, virtualiter & eminenter plura, & distinctæ dicuntur.

Confirmatur: *Pluralitas & multiplicitas sequitur ad distinctionem: Ergo sicut ad distinctionem realem perfectionum que sunt in rebus creatis, sequitur realis earum pluralitas; ita & ad virtualem distinctionem divinorum attributorum sequitur virtualis illorum multiplicitas. Hoc præmisso, breviter hinc exponenda sunt varia divinorum attributorum partitiones, à Theologis assignari solita.*

Attributa igitur quedam sunt positiva, ut esse bonum, iustum, sapientem. Quedam negativa, ut esse incorporeum, infinitum, immutabilem, invisibilem, incomprehensibilem, ineffabilem, &c. Item aliquæ sunt absolute, que nullum important respectum ad creaturas, ut esse simplicem, unum, perfectum &c. Quedam respectiva, que sine ordine ad creaturas intelligi nequeunt; ut omnipotentia, providentia, iustitia, misericordia &c. Præterea quedam sunt que pertinent ad substantiam & esse Dei: ut simplicitas, perfeccio, bonitas, infinitas, & alia que sequenti disputatione exponemus: quedam vero spectant ad operationem, ut intellectus, voluntas, omnipotentia, scientia, amor, iustitia, & misericordia, de quibus tractatu 3. & 4. differemus.

ARTICVLVS II.

An attributa divina, tam ab essentia Dei quam inter se, formaliter ex natura rei distinguuntur?

§. I.

Proponitur status difficultatis.

Suppono primò tanquam certum de fide, di-
vinæ attributa, nec ab essentia, nec inter se

DE ATTRIBVTIS DIVINIS IN COMMVN. 75

realiter entitativè differre: id est tanquam plures res & entitates inter se diversas. Quæ suppositio est contra quendam Gualterum, qui referente Nypo libro 12. Metaph. distinctionem realem entitativam inter divinā attributa admisit. Quæ etiam sententia, vel potius error, à quibusdam tribuitur Gilberto Porretano, Episcopo Pictaviensi: tum ex eo quod docuerit, divinas relationes distingui numero ab essentia divina, & esse Deo extrinsecus affixas; ut refert D. Thomas infra quest. 28. art. 2. Tum etiam quia afferuit, attributa divina non prædicari de Deo in abstracto, sed tantum in concreto; quasi Deus non esset sapientia, sed sapiens; nec iustitia, sed iustus: ex quo colligitur illum admisisse distinctionem realē inter suppositum divina natura, & ejus attributa; quamvis ipsa attributa non dixerit realiter inter se distingui, ut testatur D. Bernardus serm. 8o. in Cantica, & libro 5. de consideratione.

Probatur ergo multipliciter haec suppositio. In primis enim, si divina attributa realiter entitativè à divina essentia distinguerentur, Deus non esset simplex, sed compositus ex essentia & attributis: At hoc repugnat principijs fidei, & definitioni Concilij Lateranensis in cap. *firmiter de summa Trinit.* Ergo &c. Sequela Majoris probatur: Compositio, ut docent Philosophi, est distinctionum unio: Ergo si divina attributa essent realiter entitativè à divina essentia distincta, cùm non sint ab illa separata, sed illi intimè conjuncta, manifestum est quod realem compositionem cum illa efficerent. Unde D. Bernardus 5. de consideratione: *Nisi omnia unum in Deo, & cum Deo consideres, habebis multiplicem Deum.* Et infra: *Tam non est simplex quod vel uni fuerit obnoxium formæ, quam nec virgo, vel uni cognita virgo.*

Secundo, in eodem Concilio Lateranensi negatur in Deo esse quaternitatem, quæ non minus foret, si attributa realiter ab essentia vel inter se distinguerentur, quam si personæ realiter distinguerentur ab illa: ubicumque enim est distinctio, est etiam multiplicitas & pluralitas, in ea ratione in qua est distinctio: immo cùm attributa sint longè plura quamquatuor, in Deo non solum esset quaternitas, sed etiam (ut ita dicam) centenitas, ut arguit D. Bernardus loco citato, contra Gilbertum, his verbis: *Multa dicuntur esse in Deo, & quidem sane, catholicè que, sed multa unum: aliquin si diversa putamus, non quaternitatem habebis, sed centenitatem.*

Tertiò, in Concilio Rhemeni, sub Eugenio III. contra eundem Gilbertum definitum fuit, Deum non nisi sapientia, quæ ipse Deus est, sapientem esse; nec nisi magnitudine, quæ est ipse Deus, magnum esse: quæ definitio stare non potest, si Dei sapientia, aut magnitudo, ab ejus essentia realiter entitativè distinguatur. Unde idem Bernardus in hoc Concilio requisitus, ut ejus propositiones scriberentur; sicut ipse volebat scribi propositiones Gilberti, in quem agebat: *Scribatur (inquit) stylō ferreo, in ungue adamantino, vel sculpatur in silice: quod divina essentia, forma, natura, deitas, bonitas, sapientia, virtus, potentia, magnitudo, verè est Deus.*

Quartò, in Concilio Toletano II. & in Florentino dicitur, in divinis omnia esse unum, ubi non obviat relationis oppositio: Sed inter essentiam & attributa, vel inter ipsa attributa, relationis oppositio non intercedit, ut constat:

Tom. I.

A Ergo illa unum sunt.

Denique, si attributa realiter entitativè à divina essentia distinguerentur, illa non esset actus purus, quia esset perfectibilis per formas à se realiter distinctas, nec infinita, quia in se, nec formaliter, nec identicè, omnes perfectiones simpliciter simplices contineret.

Hoc ergo supposito tanquam de fide certo, & exclusa inter divinam essentiam, & ejus attributa, distinctione reali entitativa; in controversiam vertitur, an saltem inter illa admitti possit distinctione formalis ex natura rei, qualem Scotus & ejus Discipuli, inter genus & differentiam, aliosque gradus metaphysicos admittunt. Quod ut fiat adhuc evidenter, & status hujus celeberrimæ questionis, quæ inter utriusque Scholæ, Angelicæ, & Subtilis Discipulos versatur, clare percipiatur.

Suppono secundò: Scotum & ejus Discipulos, præter distinctionem realē entitativam, & modalem, quæ versatur inter res, seu modos, saltem de potentia Dei separabiles, & rationis, quæ oritur ex diversis mentis concepibus, admittere aliam, quam unum ex ipsa natura, & essentia sua, & ante omnem mentis operationem non est aliud, nec de conceptu formaliter alterius; & ita insensu formaliter non identificantur, licet in eadem realitate & entitate convenient: & ideo hanc distinctionem vocant, *formalem ex natura rei*; id est negantem identificationem in sensu formaliter, ex ipsa propria rei natura & definitione. Quare Scotus in 1. dist. 2. quest. 1. hanc distinctionem magis non identitatem, quam distinctionem, dicit esse appellandam. Sed quidquid sit de modo loquendi, concedit Scotus illam esse realē, & actualem, & prævenire omnem mentis operationem, ut constabit ex ejus verbis, infra referendis. Quaritur ergo, an talis distinctione inter divinam essentiam, & ejus attributa, & inter ipsa attributa, admittenda sit? ita quod licet in Deo, natura, & attributa, in eadem realitate & entitate convenient; quidditas tamen & natura unius, ante omnem mentis operationem, non sit quidditas & natura alterius; ac proinde unum non possit de alio in abstracto, sed tantum in concreto prædicari, & Deus possit quidem vocari bonus, iustus, & sapiens: Deitas tamen non possit dici bonitas, iustitia, sapientia &c.

Partem affirmativam tenet Scotus in 1. dist. 8. quest. 4. §. ad 4. afferens attributa divina, tum inter se, tum ab essentia divina, ex natura rei distinguiri. Et licet non desint graves Authores, qui eum intelligent, & exponant, de distinctione reali solidū fundamentaliter, qualem ceteri Theologi admittunt, & quæ virtualis, seu eminentialis appellari solet: modernitatem Scotistæ huic interpretationi non acquiescunt, sed distinctionem realē & actualem, ac præcedentem omnem mentis operationem, inter essentiam & attributa, ex sui Doctoris mente defendunt. Et certè ipsum Doctor subtilis in 1. dist. 8. quest. 4. ita clare seipsum explicat, ut de ejus mente, nullus dubitationi relinquatur locus. Ibi enim agens de distinctione, quæ est inter sapientiam & bonitatem in Deo, sic loquitur: *Est ergo ibi distinctione tertia, PRÆCEDENS INTELLECTVM OMNI MODO; & est ipsa, quod sapientia est in re, ex natura rei, & bonitas est in re, ex natura rei. Sapientia autem in re, formaliter non est bonitas in re.* Ex quibus verbis aperte constat, Scotum inter bonitatem & sapientiam divinam, admittere

K ij

distinctionem tertiam, precedentem intellectum omni modo, ac proinde realem, & actualiem a parte rei, & non solum virtualēm, & fundamentalēm, quae fiat actualis per intellectum, qualem catet Theologi admittunt. Et licet hæc Scotti sententia, à multis gravi censurā notetur; *Et absurdā, vel erroneā, & à communī Patrum doctrina penitus aliena appelletur*, ut videri potest apud Tannerum hic disp. 2. dub. 2. ab his tamen censuris, & verborum aculeis abstinentem putamus; solaque ratione, & argumentorum vi, cum Discipulis Scotti §. sequenti disputatione.

S. II.

Variis rationibus hæc sententia Scotti impugnatur.

Dico igitur: Divina attributa non distinguuntur inter se, nec ab essentia divina, distinctione formalē, seu ex natura rei, quam ponunt Scotti, & ejus Discipuli: Sed absolute dicendum est, attributa non distinguunt actuali distinctione, nisi per conceptus nostros; ante illos vero omnimodam unitatem habere, & solum fundamentalē, seu virtualem distinctionem.

Hæc conclusio in primis probari posset, impugnando distinctionem illam formalem, & ex natura rei; ac ostendendo, vel illam esse chimericam & impossibilem, vel non esse actualēm à parte rei, sed tantum virtualem & fundamentalēm, & fieri actualēm per intellectū operationem. Sed quia hæc ad Philosophiam spectant, ea brevitas causā prætermittant, & rationibus Theologicis ostendam, quod licet in rebus creatis daretur hæc distinctione, illa tamen repugnaret divinis attributis.

10. Prima ratio sumitur ex puritate & simplicitate divinæ naturæ, quam hæc distinctione Scotica, non minus lacerare ac violare videtur, quam sententia Gualteri, & Gilberti, initio hujus articuli impugnata. Sicut enim si esset distinctione entitativa inter essentiam divinam, & ejus attributa, resultaret ex illis compositionis realis entitativa, ut ibidem demonstravimus: ita si distinguantur distinctione reali formalē, realis formalis compositionis ex illis resultabat.

Confirmatur & magis illustratur hæc ratio. Compositionis est distinctionum unio: Ergo sicut unio distinctionum, distinctione reali entitativa, est compositionis entitativa realis; ita unio distinctionum, distinctione reali formalē, est compositionis formalis.

11. Respondent Scottistæ: Ad compositionem realēm necessarii requiri unionem extremonrum, distinctione reali entitativā gaudientium; quia extrema compositionis debent inter se comparari per modum potentiarum & actuum: eo autem ipso quod divina essentia ab attributis non distinguatur entitativa, sed solum formaliter, est omnino infinita, & consequenter comparari nequit ut potentia adilla; ac proinde ex illorum unione cum divina essentia, resultare nequit compositionis etiam formalis.

Verum hæc responsio in primis videtur omnino voluntaria. Nam definitio compositionis est quod sit unio distinctionum: Ergo vera compositionis, solum distinctionem, & unionem extremonrum exposcit, nec essentialiter requirit, quod illa inter se comparentur per modum actuum & potentiarum.

A Secundò, Comparatio per modum potentiarum & actuum, vel requiritur ex conceptu compositionis, abstrahentis à per se tali, & tali per accidens; aut ex conceptu compositionis talis per se: Neutrū dici potest: Ergo illa non requiritur. Minor quantum ad primam partem est evidens: nam compositionum per accidens resultat ex extremitibus, non comparatis per modum potentiarum & actuum. Probatur vero quantum ad secundam. Compositionis per se, differit a compositione per accidens, in eo quod in hac extrema non uniuersitatem per se in tertio, bene autem in illa: Ergo data hac persicte unionis extremonrum in tertio, etiā non comparentur ut actus & potentia, resultabit compositionis per se.

B Tertiò, Ex partibus integralibus resultat compositionis integralis, ex subsistentia Verbi & humana natura, componitur Christus, ut docent Theologi in Tractatu de Incarnatione; & tamen nec una pars integrans, ad aliam; nec subsistentia Verbi, ad humanam naturam, ut actus ad potentiam comparatur: Ergo ad rationem compositionis, comparatio ista necessaria non est.

C Quartò, Hoc ipso quod divina essentia, ponitur ut realiter formaliter ab attributis distincta, hoc ipso ponitur ut formaliter ab illis actuabilis & perfectibilis: Ergo hoc ipso ad illa comparatur ut potentia ad actum, & perfectibile ad perfectivum; unde quamvis hæc comparatio ad veram compositionem esset necessaria, hoc tamen non obstarer, quin esset compositionis in Deo.

Denique, cum divina attributa, in sententia Scotti, non faciant unum cum divina essentia, per omnimodam identitatem; & aliunde non possint facere unum cum illa per aggregationem, alias Deus non esset unum per se, sed per accidens; & in illo non solum esset quaternitas, sed etiam plusquam centenias, ut supra dicebamus ex D. Bernardo: solum restat ut faciant unum cum ea per compositionem; nulla enim alia potest esse, aut excogitari unio, vel unitas, qua ad aliquam ex his tribus non reducatur.

D Secundò principaliter arguitur, & rursus demonstratur haec sententia Scotti, perfectam Dei simplicitatem violari. Omnimoda simplicitas non minus distinctioni, quam compositioni opponitur: Sed si in Deo esset formalis compositionis attributorum cum essentia, ille non esset perfectè simplex: Ergo similiter, si in illo sit formalis distinctionis attributorum ab essentia, perfectè simplex non erit. Minor est certa, & conceditur ab Adversariis, qui ideo non admittunt in Deo formalis compositionem, quia cum illa perfecta Dei simplicitas nequit subsistere. Major vero, in qua est difficultas, sic ostenditur. Simplicitas est species unitatis: unitas autem in indistinctione consistit: Ergo omnimoda simplicitas est omnimoda unitas, & omnimoda indistinctione: At in distinctione omnimoda, omnem realēm distinctionem excludit, non minus quam omnimoda simplicitas, omnem realēm compositionem: Ergo omnimoda simplicitas non minus opponit distinctioni quam compositioni, & consequenter si cum compositione reali formalē subsistere nequeat, nec cum distinctione reali formalē poterit stare.

E Respondent Adversarij: Hanc distinctionem non obesse divinæ simplicitati, quia est omnium minima, nec tam distinctione, quam non identitas appellanda est; sive ut alij dicunt (ad dissimulandam magis quam ad sincerè tuendam Scotti sententiam)

12:

13:

DE ATTRIBVTIS DIVINIS IN COMMVNÌ. 77

^tentiam) illa non est physica, sed logica, seu rationis in re, vel media inter realem & rationis.

Verum haec responsio est mera elusio, cum enim (ut iam ostendimus) non minus repugnet perfectae unitati & simplicitati, distinctio quam compeditio: sicut nulla compeditio, quantumvis parva, cum divina simplicitate potest subsistere (nam ut dicit Divus Bernardus supra relatus, tam non est simplex quod vel uni fuerit omnium formae, quam nec virgo vel uni cognita viro) ita nec illa realis attributorum distinctio, cum illa compofibilis est.

Præterea, Sicut omnis distinctio qua datur post operationem intellectus, est rationis; ita & omnis qua antecedit mentis considerationem, realis est: Sed distinctio illa Scotica, est præcedens intellectum omni modo, ut dicit ipse Scotus supra relatus: Ergo eam appellare logicam, seu rationis in re, vel medium inter realem & rationis, manifestus vocum abusus est, & contradicatio in terminis.

14. Tertia ratio sumitur ex infinitate Dei, & ratione actus purissimi. Ratio enim formalis divinae essentiae, & cuiuslibet attributi, non minus est simpliciter infinita, quam ejus entitas: unde sicut entitas increata Dei, quia est simpliciter infinita, perit sibi realiter identificare omnem perfectionem & beatitudinem, qua in suo conceptu imperfectionem non importat; ita & divina formalitas, ratione ejusdem infinitatis, postulat formaliter identitatem cum divinis relationibus & attributis. Item cum ratio actus purissimi omnem omnino potentiam excludat, quia cumque perfectio qua concipitur in Deo, ut actus purus, concipi debet, ut in se formaliter includens omnem aliam perfectionem: alioquin esset, & conciperetur in potentia ad illam, quod ratione actus puri repugnat.

15. Quartu suadetur conclusio ratione qua uititur D. Bernardus contra Gilbertum sermone 8o. in Cant. Si sapientia v. g. ex natura rei, & ante omnem mentis functionem, à divina essentia distinguatur, vel esset quid illa superior, vel aquale, vel inferius? Primum dici non potest, quia nihil superior natura divina, esse vel concepi potest. Neque secundum, quia daretur aliquid quod à parte rei, & actu non esset Deus, & tamen esset tanta perfectionis at divina essentia. Tertium etiam facile rejicitur, si enim esset aliquid divinae naturae inferius, formaliter esset creatura; omne enim Deo inferius creatum est, & sic Deus esset sapiens per creaturam, quod falsissimum & absurdissimum est: Ergo sapientia in Deo, ex natura rei, & ante omnem mentis functionem, à natura divina non distinguitur.

Denique probatur conclusio: Sicut omnis unio, ita & omnis distinctio, relatio quedam est, vel saltem relationem quandam, inter ea que distinguuntur, importat: Ergo ubi non datur realis relatio, neque distinctio realis existit: Atqui inter attributa & essentiam, aut inter ipsa attributa, relatio realis non datur, sed rationis tantum; solum enim quatuor relationes reales notionales, in Deo agnoscunt Theologi. Ergo neque distinctio realis, sed rationis tantum, inter illa reputatur.

Mitto quae adversus hanc sententiam afferri possent de relationibus divinis, quae in Florentino, sola ratione intelligentia, differre dicuntur ab essentia, & ab Augustino libro 7. de Trinit.

Tom. I.

A esse idem omnino cum illa, de hoc enim disputandum erit in Tractatu de Trinitate. Mitto etiam argumenta Philosophica, quibus haec distinctio Scotica, vel tanquam chimera rejicitur; vel demonstratur non esse actualem, sed tantum virtualem, & fundamentalem. De quo videri potest Iohannes à S. Thoma hic quæst. 3. art. 6. & in Logica quæst. 3. art. 3. & 6.

§. III.

Principia Scotti argumenta solvuntur.

P ro sententia Scoti proponi solet in primis tritum & commune argumentum de propositionibus contradictoriis. Ea enim de quibus vere prædicantur contradictoria, distinguuntur in re, cum idem de eodem non possit vere simul affirmari & negari: Atqui de intellectu & voluntate divina, de essentia & relatione, contradictoria verè affirmantur: putò quod intellectus generet, voluntas non generet: quod voluntas spiret, intellectus non spiret: quod divina essentia sit communicabilis, & relatio incomunicabilis: Ergo haec omnia distinguuntur in re, & non solum per mentis operationem.

Respondeo primo, hoc idem fuisse fundamentum Gilberti, ad ponendam distinctionem realis inter essentiam divinam & relationes. Et si illud aliquid concluderet, probaret in divinis attributis distinctionem non solum formalem, sed etiam realem & entitativam, ut optimè ostendit Capreolus in 1. dist. 3. quæst. 4. art. 2. ad 6. Scotti, & evidens est in divinis relationibus, essentia enim communicatur entitativè Filio, Paternitas realiter negatur de illo, & non solum formaliter; alias Pater & Filius formaliter solum, & non realiter distinguuntur: Ergo si ex contradictione, distinctione inter essentiam divinam & relationes colligitur, ex illa debet colligi distinctione non solum formalis, sed etiam realis & entitativa. Hoc ergo argumentum, quod apud Adversarios palmarium est, vel nimis, vel nihil probat.

Respondeo secundo, distinguendo Majorem. Ea de quibus prædicantur contradictoria, distinguuntur in re: formaliter, aut virtualiter, concedo: formaliter semper, nego. Cum enim distinctionis virtualis aequivalat distinctioni formalis, potest præfare totum id quod facit realis vel formalis, distinctione: sicut lux Solis, quia est calor virtualiter, totum id præstat, quod facit calor formalis. Cum ergo distinctionis realis, vel formalis, in distinctionibus creatis sufficiat ut contradictoria de illis enuntiantur, distinctionis virtualis, aut eminentialis in divinis attributis, erit etiam sufficiens ad verificanda de illis prædicata contradictoria.

E Respondeo tertio, data Majori, negando Minorem, prædicata enim in exemplum adducta, non sunt vere & propriè contradictoria; quia non enuntiantur de eodem secundum eandem rationem spectato, sed sumpto diversâ ratione, & prout in re ipsa multis aequivalent. Sensus enim hujus propositionis: *Intellectus a divina generat. Voluntas divina spirat*, hic est: eadem entitas simplex à parte rei, prout aequivalent virtuti creatrice intelligendi, generat Filium, & prout aequivalent facultati volendi, spirat Spiritum Sanctum. Item ista propositiones, *Essentia divina est communicabilis. Relatio est incomunicabilis*, significant quod eadem entitas increata Dei, prout aequivalent absoluto, est communicabilis, &

K iij

prout æquivalet relationi, incomunicabilis. A Cū ergo hæc prædicta non conveniant entitati divinae toti & totaliter, nec enuntientur de illa, ut habet rationem termini perfectè distributi; sed æquivalentis absoluto & relativio, communicabili & incomunicabili, non sunt verè & propriè contradictionia.

21. Respondeo quartò cum D. Thoma infra qu. 39. art. i. ad 2. & in 1. diff. 34. quæst. 1. art. i. ad 2. & quæstione 7. de potentia art. 1. ad 5. negando ab solutè Majorem. Ut enim ipse dicit loco ultimò citato: *De eo quod est idem re, & differentia ratione, nihil prohibet contradictionia prædicari, ut dicit Philosophus 3. Phys. scilicet patet quod idem punctum rei, differentia ratione, est principium & finis, & secundum quod est principium, non est finis, & è contrario. Unde cùm essentia & proprietas sint idem re, & differentia ratione, nihil prohibet quin unum sit communicabile, & incomunicabile.* Quibus verbis clarè docet ad verificandā diversa prædicta contradictionia, de divinis attributis & relationibus, solam distinctionem rationis sufficere. Quod etiam ratione suaderet: Contradictione enim formaliter sumpta, non est nisi in intellectu, est enim affirmatio & negatio &c. unde contradictione formalis non est nisi ens rationis: Atqui ad tollendum ensrationis, non requiritur forma positiva, sed sufficit aliud ens rationis: Ergo ad tollendam contradictionem formalem, sufficit sola distinctione rationis inter essentiam divinam & attributa.

Quod si instes, & dicas, in divinis attributis dari non solum contradictionem formalem, quæ est ens rationis, sed etiam fundamentalē, quæ est à parte rei, & ante omnem mentis operationem: similiter dicam, quod in divinis attributis est etiam distinctione fundamentalis, & virtualis à parte rei, licet non fiat formalis, & actualis, nisi per operationem intellectus. Sicut ergo contradictione formalis, tollitur per distinctionem formalem, quæ fit ab intellectu; ita & fundamentalis, per fundamentalē, quæ est à parte rei, & ante intellectus operationem.

32. Secundò pro eadem sententia principaliter arguitur: Illa que definitionibus distinguntur, debent ex natura rei distingui; quia definitio traditur de rebus secundum suam naturam consideratis: Sed sapientia & bonitas, essentia divina & relatio, definitionibus distinguntur: sapientia enim definit cognitio rei per causam altissimam, amor vero impulsus, vel pondus voluntatis in bonum; item essentia definit ad se, relationes vero in ordine ad aliud: Ergo hæc distinguuntur ex natura rei.

Respondeo essentiam, relationes, & attributa divina, definiri posse dupliciter: primò à comprehensore vidente illa ut sunt in se: secundo à viatore, prout significantur diversis nominibus, & cognoscuntur diversis conceptibus. Si primo modo definitur, eadem est illorum definitio: si autem definitur secundo modo (qualiter solum à viatore definiti possunt) diversis gaudent definitionibus: Sed ex hoc solum colligitur distinctione rationis inter illa. Unde in forma distinguo Majorem: quæ distinguuntur definitione adæquatà, & datâ de rebus quatenus sunt in se, distinguuntur ex natura rei, concedo: definitione inadæquatà, & non datâ de rebus ut sunt in se, sed quatenus per distinctos conceptus concipiuntur ab intellectu imperfectè cognoscente, nego. Ad probationem vero Minoris, quæcaus contra

hanc solutionem obstare potest, dicendum est, quod si divina essentia, relationes, & attributa, adæquate, & prout in se sunt, definitur, unum deberet ingredi definitionem alterius, & essentia deberet definiri & ad se & ad aliud, cùm in se sit eminentissimo modo absoluta & relativa.

Dices: Ex hac response sequitur, definitio nem sapientiae, & cuiuscumque attributi, vel relationis, à nobis viatoribus traditam, non esse bonam, sed defectuosam; cùm omnis definitio ut sit bona, debeat esse de re prout est in se, non prout sicut à nobis apprehendatur.

Respondeo definitionem aliquam dupliciter posse dici defectuosam: primò per excessum, attribuendo aliquid rei quod non habet: secundò per defectum, non attribuendo illi, nec explicando totum quod in se habet. Primum definitionem viciat, non secundum; etiæ seddatur illam non omnino perfectam, reique adæquatam; & hoc secundo defectu laborat omnis definitio data à viatore de Deo, ejusque attributis & relationibus, sicut & omne nomen à viatore eiimpositum.

Objicies tertio: Sapientia in communi, non est formaliter bonitas in communi: Ergo nec sapientia divina, est formaliter bonitas divina. Consequens videtur legitima, eò quod infinitas in Deo non destruit rationem formalem sapientiae ut sic, Antecedens vero probatur. Si sapientia in communi esset formaliter bonitas in communi, omnis sapientia etiam creata, esset formaliter bonitas; quod enim convenit sapientiae ut sic, omni sapientiae convenire debet: Sed falso. Consequens: Ergo & Antecedens.

Respondeo Antecedens laborare in æquivoco, ac proinde esse distinguendum, & explicandum: si enim sensus illius sit, quod sapientia ut sic, non petit realiter distinguere à bonitate, verum est: si autem illud significet, quod sapientia ut sic, repugnet identificari realiter cum bonitate, falsum. Nam sapientia ut sic, nec identitatem, nec distinctionem realem cum bonitate & aliis perfectionibus exposcit; sed ab utraque imperfectè abstrahit, vel potius utramque implicitè importat: cùm enim ratio sapientiae ut sic, sit analoga ad sapientiam creatam & increatam, utramque implicitè includit, ac proinde etiam implicitè importat, vel identitatem, vel diversitatem formalem ab aliis perfectionibus, secundum quod natura & conditio analogatorum exposcit: nam prout implicitè involvit sapientiam creatam, implicitè etiam includit distinctionem realem à bonitate: è contra vero, ut implicitè includit sapientiam increatam, implicitè etiam identitatem realem cum bonitate importat. Ex quo patet,

E quod infinitas non destruit rationem formalem sapientiae ut sic (cùm illa secundum se non petat distinguere à bonitate, & aliis perfectionibus) sed potius eam elevat & perficit, ab ea tollendo potentialitatem & limitationem, quæ illam impedit, ne bonitatem, aliasque perfectiones simpliciter simplices, sibi identificet in rebus creatis.

Objicies quartò: Intellectus noster formans hanc enunciationem, sapientia divina, formaliter non est bonitas divina: non causat illam veritatem, sed illam invenit in re: ex eo enim quod res est, vel non est, propositio est vera vel falsa; & non ex eo, quod hoc aut illud ei tribuatur ab intellectu: Ergo distinctione formalis horum at-

23:

24:

25:

DE ATTRIBVTIS DIVINIS IN COMMVN. 79

tributorum, debet esse in re, & non tantum in intellectu.

Respondeo duplicem esse sensum hujus propositionis, nam vox, *formaliter*, dupliciter sumi potest: primò absolute, & pro essentia & quidditate rei, ut est in se: secundò relativè, & pro essentia rei; ut substat diversis conceptibus formalibus intellectus creati, & ab illis extrinsecè denominatur distincta. Si ergo hæc propositio: *Sapientia divina, formaliter non est bonitas divina*, in primo sensu accipiatur, & usurpetur pro essentia, & quidditate horum attributorum, ut est in se, falsa est, & neganda, cum hac attributa in se formaliter non distinguantur. Si vero in secundo sensu intelligatur, & sumatur pro essentia & quidditate horum attributorum, ut substat diversis conceptibus formalibus intellectus creati, vera est, & concedenda: si eum tamen hæc distinctio non est formaliter in re, sed tantum fundamentaliter, ita & veritas talis propositionis.

26. Objicis ultimò: Inter passionem demonstram, & medium per quod demonstratur, debet esse realis distinctio, alias idem per idem probaretur, quod esset potius nigrari, quam demonstrare; omnesque termini qui de Deo enunciantur, essent synonimi: Sed in Deo unum attributum demonstratur per aliud, ut voluntas per intellectum, intellectus per immaterialitatem, æternitas per immutabilitatem, & alia similia: Ergo inter divina attributa debet esse aliqua realis distinctio.

Respondeo negando Majorem; ad demonstrationem enim non requiritur distinctio realis, inter ea quæ demonstrantur, sed sufficit virtualis, ut constat in proprietatibus entis, quæ in Metaphysica demonstrantur per rationem entis, à qua tamen virtualiter solum distinguntur. Imo potius, cum ad demonstrationem requiratur conexio inter ea quæ assumuntur & inferuntur; & illa tanto major sit, quanto minor est distinctio in re, tantum absit, quod ad demonstrationem requiratur distinctio realis inter passionem demonstratam, & medium per quod demonstratur; quin potius talis distinctio illi magis videatur obesse quam prodesse.

Ad id vero quod additur, responderetur quod licet aliqua nomina rem eandem significant, si tamen illam significant sub diversis conceptibus qui habeant fundamentum in re, quæ ob sui eminentiam æquiveleat pluribus, non sunt, nec dici debent synonima. Ut enim docet D. Thomas infra quest. 13. art. 4. nomina non imponuntur solum ad significandas res, sed etiam conceptus; & ideo nominamus sicut concipimus: ubi ergo sunt plures conceptus habentes fundamentum in re, plura etiam sunt nomina non synonima.

ARTICVLVS III.

An, & quæ distinctionem rationis in divinis attributis admittenda sit?

§. I.

27. Quibusdam premisis, referuntur sententiae.

Notandum primo: Distinctionem rationis dividi in distinctionem rationis ratiocinantis, & rationis ratiocinatae. Prima dicitur illa

A quæ nullum habet fundamentum in re, sed in sola facultate intellectus, pro libito multiplicans & distinguens rem quæ nullo modo actu aut virtute est multiplex; ut quando intellectus idem de eodem formaliter prædicat, & per se, ut prædicatum, à seipso, ut subiecto, distinguuntur. Secunda vero est illa quæ habet in re fundamentum, & ab intellectu accipit complementum & actualitatem: ut cum lumen Solis, quod actu est unum, & virtute multiplex: ut pote virtualiter continens calorem, siccitatem &c. concipiatur actu multiplex & distinctum.

Notandum secundò: Distinctionem rationis ratiocinatae fieri posse, vel per actum iudicati-

28.

vum, affirmando aliqua inter se distingui: vel solum per simplicem apprehensionem, apprehendendo unum sine alio, non tamen iudicando, vel affirmando unum non esse aliud. Distinctio primo modo facta, ut sit vera, & cum fundamento, requirit quod distinctio detur in re, quia veritas iudicij sit per adæquationem ad id quod est in re: unde si vere iudicantur aliqua distincti, opòrtet quod in re talis distinctio sit; alioquin falsum erit iudicium. Secundù autem distinctione rationis, quæ sit secundo modo, & per simplicem intellectus apprehensionem: illa enim non requirit pro fundamento aliquam distinctionem realem, sed sufficit quod ex parte rei cognite inventiatur eminencia, & multiplicitas virtualis, quæ unico conceptu non possit ab intellectu exhaustiri & adæquare. Unde D. Thomas 1. parte, quest. 84. art. 1. advertit, hanc fuisse causam errandi Platoni, quando posuit ideas separatas; quia existimavit objecta eo modo debere reperiri in re, sicut ab intellectu cognoscuntur.

D Notandum tertio: Quod intellectus in ista distinctione rationis per apprehensionem, adhuc dupliciter potest procedere: primò per totalem & integrum præcisionem, ita quod illud quod præscinditur, ait non includat aliud à quo abstractur, sed ita excludat, quod remaneat in potentia ad illud: quo pacto gradus genericus præscinditur à differentiali. Alio modo distinguitur unum ab alio, non per præcisionem totalem, sed penes explicitum & implicitum; ita quod unum actu includatur in alio, nec remaneat in potentia ad illud, sed tamen non explicetur, nec exprimatur distinctè, sed confusè tantum, & implicitè in eo contineatur: quo pacto ratio entis præscindit à suis inferioribus, ut docetur in Metaphysica.

Ex his ergo facilè intelligetur status questio-

30.

nis propositæ, & sententiarum diversitas: inquirimus enim in primis, quænam rationis distinctio in divinis attributis admittenda sit? An illa sit rationis ratiocinata, & cum fundamento in re; vel tantum rationis ratiocinantis, & ex sola facultate intellectus? Secundò queritur, an illa sit per totalem & integrum præcisionem, vel solum penes explicitum & implicitum? In cuius difficultatis resolutione, tres sunt sententiae.

Prima assertit divina attributa, tum inter se, tum ab essentia, solum ratione ratiocinante distinguuntur, vel solum connotatione quadam extrinsecè ad res creatas; ita ut eadem entitas increata Dei, ut connotat effectus à se producibilis, dicatur omnipotens: sapientia vero, vel scientia, ut connotat res sibi objectivè præsentes, & à se cognitas. Ita docent Nominales in 1. distinct. 8. quibus ex recentioribus favet